

四庫全書

集部

欽定四庫全書

史部

甘肅通志卷四十八

詳校官駁察御史臣李陽秋

檢討臣德生覆勘

總校官檢討臣何思鈞

校對官中書臣葉葵

膳錄監生臣左熙世

欽定四庫全書

甘肅通志卷四十八

藝文

贊

魏曹植伏羲贊 木德風姓八卦創焉龍瑞名官法地

象天庖厨祭祀網罟漁佃瑟琴以作時通神軒

曹植黃帝贊 少典之孫神明聖哲土德承火赤帝

是滅服牛乘馬衣裳是制氏雲名官功冠五帝

晉王彪之伏羲贊

悠悠皇犧體尊神澄無爲而化出

道之疑不知有始冥感自興因應之跡畫象結繩

唐李華侯知道程俱羅二孝贊 厥初生人有君有親

孝親爲子忠君爲臣兆自天命降及人倫背死不義

忘生不仁過及智就爲之禮文至哉侯氏創巨病殷

手足胼胝以成高墳夜黑颺動如臨鬼神哭無常聲

迥徹蒼旻其斬三年爾獨終身嗟嗟程生其哀也均

顧後絕配瞻前無隣

序

唐杜牧李賀詩編序 太和五年十月中半夜時舍外

有疾呼傳緘書者牧曰必有異亟取火來及發之果
集賢學士沈公子明書一通曰我亡友李賀元和中
義愛甚厚日夕相與起居飲食賀且死嘗授我平生
所著歌詩襍爲四編凡二百三十三首數年來東西
南北良爲已失今夕醉解不復得寐即閱理篋帙忽
得賀詩前授我者思理往事凡與賀話言嬉遊一處

所一物候一日一夕一觴一飯顯顯焉無有忘棄者
不覺出涕賀復無家室子弟得以給養卹問長恨想
其人詠味其言止矣子厚於我與我爲賀集序盡道
其所來由亦少解我意牧其夕不果以書道不可明
日就公謝且曰世謂賀才絕出前讓居數日牧深維
公曰公於詩爲深妙竒博且復盡知賀之得失短長
今實叙賀公曰子固若是是當慢我牧因不敢復辭
勉爲賀序然甚慙賀唐皇諸孫字長吉元和中韓吏

部亦頗道其歌詩雲烟綿聯不足為其態也水之迢
迢不足為其情也春之盎盎不足為其和也秋之明
潔不足為其高也風檣陣馬不足為其勇也瓦棺篆
鼎不足為其古也時花美女不足為其色也荒國彫
殿梗莽邱隴不足為其恨怨悲愁也鯨呿鼉擲牛鬼
蛇神不足為其虛荒誕幻也蓋騷之苗裔理雖不及
辭或過之騷有感怨刺懟言及君臣理亂時有以激
發人意乃賀所為得無有是賀能探尋前事所以深

歎恨古今未嘗經道者金銅仙人辭漢歌補梁庾肩吾
宮體謠求取情狀離絕遠去筆墨畦徑間亦殊不能
知之賀生二十七年死矣世皆曰使賀且未死少加
以理奴僕命騷可也

明趙時春送鞠通判序 鞠君吳松之產也時春與吳
松馮御史子仁同賜第而其名為宮寮也復佐吳松
徐洗馬子升於司經御史君以擊奸宰瀕死英聲振
天下洗馬君晉為祭酒其道且大行衆將倚以經世

之任者俱余所推重然皆與鞠君交親方君之擢判
平涼也二君與時春書譽君之才且良惜其遠出邊
郡畫然同辭則夫時春于君之釋吾郡而他之也豈
敢以俚蕪辭無一言以贈之按吳松本江海與暑之
區而平涼據秦夏華羗之會黍杭異味羊魚改腥茗
酪殊氣葛裘別服吳松甌者垂髻削刺而謳吟平涼
三尺童子作木為弓綴筋為絃被竹木以烏雉羽而
射不避狼虎纔離保母已手掣生馬鬃騁乎峻阪兀

崖之上以相笑樂使挽一葦筏行涇汭岸乃愕然失
措嗟夫禹別九土周辨職方世以揚雍指為秦越其
風土嗜好背馳懸絕固若是哉况宋以文獻渡江中
原久委域外南北之俗尤異大聖人受錫四海行三
尺法以用人故鞠君遠超南服莅止西邑揆之人情
似有不相宜者而平涼強宗悍牧藩衛兵騎星錯奕
布三尺法六籍術亡奈之何而君周旋期月間數搏
執強梗固所恫悚使底于成必有可觀矣君遽以南

北之分爲解大僚不察從而聽之夫君子所誦者道
非必其身之安也所存者志非貴乎外物之奉也居
此而思彼營物而役志君子之戒也君豈爲是哉不
察其志而徇夫物情不用其道而苟榮其身此君子
之所不敢安而鞠君之所必去此郡而他適也故敢
于其行而僭言之且以章君之志也

黃諫帝王紀年纂要序 予家西陲幼時聞老於從
征者道使西域時出玉關數千里其地廣漠皆平沙

一望無有涯際又無山阜林木城郭民居墩堠為之
表識惟信馬徐行晝則視日之出入為東西夜則望
北斗而西走暨抵其國則所行不少差比來京師會
東南之士語及泛舟海中亦與是若吁使沙漠烟海
之中苟不仰望日月星辰則趨向無方不惟迂其道
里勞其心力而又未始不以終莫能至為怖也暑夏
朝回日長無事因閱舊書得先子壽栢翁所藏歷代
纂要乃元平章白雲翁察罕所編蓋取皇極經世書

為準一開卷而古今成敗國家興衰運祚長短皆瞭然可見真若茫茫萬里沙漠烟海中而獲舉目於日月星辰以得指歸也嗚呼自書春秋諸史以來簡籍浩繁雖易紀傳為編年其間數千年之事欲自首至尾觀之信有若司馬公所謂讀未半卷即已倦睡也然史學不可不知奈以賦稟所拘有朝讀暮忘者是編則摭羣籍之要撮萬事之統損繁就簡約編年而為之蓋免搜索之勞使人不怖其煩因年以求運祚

修短則古今國家成敗興衰具見于此遂為訂正自
延祐戊午至洪武戊申凡若干年以便考閱宗友用
和見而喜之請鋟諸梓以傳既不容拒併序諸篇首
以畀之予聞先輩謂觀史有要然則是編其亦觀史
之要乎能熟觀此以知其大要則如日月星辰之在
人目睫故雲海沙漠之渺無涯際亦自得之矣又奚
以怖

李夢陽弘德集自序 李子曰曹縣蓋有王叔武云

其言曰夫詩者天地自然之音也今途哭而巷謳勞
呻而康吟一唱而羣和者其真也斯之謂風也孔子
曰禮失而求之野今真詩乃在民間而文人學子顧
往往為韻言謂之詩夫孟子謂詩亡然後春秋作者
雅也而風者亦遂棄而不采不列之樂官悲夫李子
曰嗟異哉有是乎予嘗聆民間音矣其曲邊其思淫
其聲哀其調靡靡是金元之樂也奚其真王子曰真
者音之發而情之原也古者國異風即其俗成風今

之俗既歷邊乃其曲烏得而不邊也故真者音之發而情之原也非雅俗之辨也且子之聆之也亦其譜而聲者也不有率然而謠勃然而詖者乎莫知所從來而長短疾徐無弗諧焉斯誰使之也李子聞之矍然而興曰大哉漢以來不復聞此矣王子曰詩有六義比興要焉夫文人學子比興寡而直率多何也出於情寡而工於詞多也夫達巷齋蠢之夫固無文也乃其謳也嘒也呻也吟也行咕而坐歌食咄而寤嗟

此唱而彼和無不有比焉興焉無非其情也斯足以
觀義矣故曰詩者天地自然之音也李子曰雖然子
之論者風耳夫雅頌不出文人學子手乎王子曰是
音也不見於世久矣雖有作者微矣李子于是憮然
失已灑然省也于是廢唐近體諸篇而為李杜歌行
王子曰斯馳騁之技也李子於是為六朝詩王子曰
斯綺麗之餘也於是詩為晉魏曰比辭而屬義斯謂
有意於是為賦騷曰異其意而襲其言斯謂有蹊於

是為琴操古歌詩曰似矣然糟粕也於是為四言入
風出雅曰近之矣然無所用之矣子其休矣李子聞
之聞然無以難也自錄其詩藏篋笥中今二十年矣
乃有刻而布者李子聞之懼且慙曰予之詩非真也
王子所謂文人學子韻言耳出之情寡而工之詞多
者也然又弘治正德間詩耳故自題曰弘德集每自
欲改之以求其真然今老矣曾子曰時有所弗及學
之謂哉

傳

隋皇甫謐酒泉烈女龐娥親傳 酒泉烈女龐娥親者
表氏龐子夏之妻祿福趙君安之女也君安為同縣
李壽所殺娥親有男弟三人皆欲報讐壽深以為備
會遭災疫三人皆死壽聞大喜請會宗族共相慶賀
云趙氏強壯已盡惟有女弱何足復憂防備懈弛娥
親子消出行聞壽此言還以啓娥親娥親既素有報
讐之心及聞壽言感激愈深愴然隕涕曰李壽汝莫

喜也終不活汝戴履天地為吾門戶吾三弟之羞也
焉知娥親不手刃殺汝而自徼倖耶陰市名刀挾長
持短晝夜哀酸志在殺壽壽為人兇豪聞娥親之言
更乘馬帶刀鄉人皆畏憚之比隣有徐氏婦憂娥親
不能制恐反見中害每諫止之曰李壽男子也凶惡
有素如今備衛在身爾雖有猛烈之志而強弱不敵
邂逅不制則為重受禍於壽絕滅門戶痛辱不輕也
願詳舉動為門戶之計娥親曰父母之讐不同天地

共日月者也李壽不死娥親視息世間活復何求今
雖三弟早死門戶泯絕而娥親猶在豈可假手於人
哉若以卿心況我則李壽不可得殺論我之心壽必
為我所殺明矣夜數磨礪所持刀訖扼腕切齒悲啼
長歎家人及隣里咸共笑之娥親謂左右曰卿等笑
我直以我女弱不能殺壽故也要當以壽頸血汚此
刀必令汝輩見之遂棄家事乘鹿車伺壽至光和二
年二月上旬以白日清時於都亭之前與壽相遇便

下車扣壽馬叱之壽驚愕迴馬欲走娥親奮刀砍之
並傷其馬馬驚壽擠道邊溝中娥親尋復就地砍之
深中樹闌折所持刀壽被創未死娥親因前欲取壽
所佩刀殺壽壽護刀瞋目大呼跳梁而起娥親乃挺
身奮手左抵其額右搯其喉反復盤旋應手而倒遂
拔其刀以截壽頭持詣都亭歸罪有司徐步詣獄辭
顏不變時祿福長漢陽尹嘉不忍論娥親即解印綬
去官弛法縱之娥親曰讐塞身死妾之明分也治獄

制刑君之常典也何敢貪生以枉官法鄉人聞之傾
城奔往觀者如堵焉莫不為之悲喜慷慨嗟歎也守
尉不敢公縱陰語使去以便宜自匿娥親抗聲大言
曰枉法逃死非妾本心今讐人已雪死則妾分乞得
歸法以全國體雖復萬死於娥親已足不敢貪生為
明廷負也尉固不聽所執娥親復言曰匹婦雖微猶
知憲制殺人之罪法所不縱今既犯之義無可逃乞
就刑戮隕身朝市肅明王法娥親之願也辭氣愈厲

面無懼色尉知其難奪強載還家涼州刺史周洪酒
泉太守劉班等共表上稱其節義刊石立碑顯其門
閭大昌弘農張奐貴尚所履以束帛二十端禮之海
內聞之者莫不改容贊善高大其義故黃門侍郎安
定梁寬追述娥親為其作傳元晏先生曰父母之讐
不與共天地蓋男子之所為也而娥親以女弱之微
念父辱之酷痛感讐黨之凶言奮劍讐讐頸人馬俱摧
塞亡父之怨冤雪三弟之永恨近古以來未之有也

詩曰修我戈矛與子同仇娥親之謂也

唐李商隱李長吉小傳

京兆杜牧為李長吉集序狀

長吉之奇甚盡世傳之長吉姊嫁王氏者語長吉之事尤備長吉細瘦通眉長指爪能苦吟疾書最先為昌黎韓愈所知所與遊者王參元楊敬之權璩崔植為客每旦日出與諸公遊未嘗得題然後為詩如他人思量牽合以及程限為意怕從小奚奴騎距驢背一古破錦囊遇有所得即書投囊中及暮歸太夫人

使婢探囊出之見所書多輒曰是兒要當嘔出心肝
始已耳上燈與食長吉從婢取書研墨疊紙足成之
投他囊中非大醉及吊喪日率如此過亦不復省王
楊華時復來探取寫去長吉往往獨騎往來京洛所
至或時有著隨棄之故沈子明家所餘四卷而已長
吉將死時忽晝見一緋衣人駕赤虬持一版書若太
古策或霹靂石文者云當召長吉長吉了不能讀歎
下榻叩頭言阿嬬

長吉學語時
呼太夫人云

老且病賀不願去緋

衣人笑曰帝成白玉樓立詔君為記天上差樂不苦
長吉獨立榻邊人盡見之長吉氣絕常所居牕中勃
勃有煙氣聞行車嚙管之聲太夫人急止人哭待之
如炊五斗黍許時長吉竟死王氏子非能造作謂長
吉者實所見如此嗚呼天蒼蒼而高也上果有帝耶
帝果有苑囿宮室觀閣之玩耶苟信然則天之高邈
帝之尊嚴亦宜有人物文采愈此世者何獨眷眷於
長吉而使其不壽耶噫又豈所謂才而奇者不獨地

上少耶天上亦不多耶長吉生二十七年位不過奉
禮太常當時人亦多排擯毀斥之又豈才而奇者帝
獨重之人反不重耶又豈人見會勝帝耶

明李夢陽邵道人傳 邵道人者蜀人也至慶陽年七
十餘矣道人不欲言凡事頤指色授館于鐘樓街築
土被衲無晝夜露坐郡中子弟爭事道人凡所指授
諸弟子善承之道人能治病令病者張目噓氣即可
活目諸弟子置飯病者前出袖中錢尺橫飯上誦大

悲呪已起尺摩病者曰瘥矣脫不可活道人則趨出
病家以死日請出指示日如其數道人不取錢每歲
自正月始活一人取布尺裏衲裏完弗取也飯道人
無問多少美惡道人善飲水冬月水道人齒間澆澆
聲頃之肩踴面紅汗簌簌下予世父患脛瘍久不愈
以問道人道人曰此祟也若往聘某氏謂其女陋將
更聘之女慚而縊死此其祟也世父大驚伏地頓首
曰奈何道人曰今遇我三日解矣三日瘍果瘥居十

餘年忽謂諸弟子將歸諸弟子曰先生福慶之人慶
之人無敢慢先生者何遽言歸邪道人不應一日道
人令設几三層坐其上諸弟子始悟環守之夜有登
几伺其息者夜半霹靂陰陰起屋脊若戈士甲馬戰
鬪之聲諸弟子震懾伏地天明起眎則道人死矣贊
曰子不語怪則道人者為何如人哉老氏惑人亂政
而道人口悛悛不欲道辭急人之難斃而後已嗚呼
是所謂逃于墨者非邪

書

皇清王全臣上巡撫言渠務書 唐漢兩渠寧夏民命攸

關康熙四十八年正月內蒙飭水利都司王應龍盡
力春工而令職全贊理其事幸覩成效茲蒙以各渠
情形及修濬利弊下詢謹詳陳之寧夏古朔方也黃
河遠於東賀蘭峙於西相距或四五十里遠者亦不
過百餘里南至唐壩堡之分守嶺北至威鎮堡之邊
牆僅二百七十五里延袤不甚寬廣而所屬寧夏衛

并左右二衛及平羅所共轄五十二堡約計田地九千八百二十九頃有餘其正供除麥饌等項納銀二千六百五十兩有零外田土之賦計納糧九萬八千三百八十餘石納七斤穀草并年例秋青草共三十八萬三百餘束零納壩草六十一萬零納地畝銀八百六十餘兩其湖灘又納潮鰾銀一千五百九十兩賦亦綦重矣況地大半盡屬沙鰾必得河水乃潤必得濁泥乃沃古人於黃河西岸開濬唐漢兩渠誠萬

世利也四十七年春職全蒞任之時值春工方興隨
本道鞠宸咨親詣各渠細勘竊查黃河自南而北其
入寧夏之處兩岸俱係石山名曰硤口河初向東北
流入硤微折注於西北不一二里即仍向東北出硤
硤之盡處有一觀音堂古人於此傍石山之麓開唐
渠一道渠口寬十八丈深七尺至明代寧夏道汪文
輝於右衛之唐壩堡距渠口二十里建石正閘一座
閘之外建石退水閘四座正閘下入渠之水以五寸

金華縣志卷之十八
為一分止以十分為率水小則閉塞退水各閘使水
入渠水大則開退水以洩其勢其正閘係六空西四
空為唐渠東兩空為貼渠每空各寬一丈唐渠自閘
以下西北至玉泉橋名曰上上段寬八大深三五尺
長五十里自玉泉橋向東北流復微轉西至良田渠
口名曰上段寬七丈深五六尺長七十里自良田渠
口西北至西門橋名曰上中段寬六丈深七尺長四
十里自西門橋西北至站馬橋名曰下中段寬六丈

深七尺長六十里自站馬橋北至威鎮堡稍止名曰
下段寬三丈深三四尺長一百三里合計共長三百
二十三里其貼渠一道寬三丈五尺深六尺至郭家
寺地方分為兩稍一至漢壩堡稍止長四十里名曰

舊貼渠一至蔣鼎堡稍止長五十里名曰新貼渠此
因唐渠正閘之東岸地土甚高故引此渠雖閘分兩
派而實與唐渠同口蓋唐渠之附庸也渠兩岸之堤
及堵水之壩俱名曰泔沿泔居民挖小渠以引水入

田名曰枝渠大者或百餘里小者或數十里及七八里不一各於潁上建小木閘以便蓄洩名曰陡口唐渠東西兩岸共陡口四百三十六道舊例百姓有田一分者歲出夫一名計力役三十日又納草一分計四十八束每束重十六斤又納柳椿十五根每根長三尺此輸將定額也其或需用紅柳白茨席其則於草內折收每草一分折紅柳四十八束或折白茨或折席其亦各四十八束每束重七斤總名曰顏料或

石灰亦於草內折銀燒造每草一束折銀一分其草
曰壩草以備於險要處和土築湃及啓閉各閘堵疊
渠口也椿曰沙椿或釘閘底或釘湃岸使土堅固也
渠內水衝之處必用土草築一墩以逼水而外用紅
柳白茨護之更釘以沙椿名曰馬頭席箕則繩纜之
具也或修理閘底亦必用紅柳白茨鋪墊而以沙椿
釘之乃蓋以石條使無沖動之患也每歲河凍之時
將渠口用草閉塞名曰捲掃至清明日派撥夫役赴

渠挑濬各官分段督催以一月為期名曰春工至立夏日掣去所捲之埽放水入渠名曰開水開水之後田地澆灌其法先委官閉塞上流各隄口以逼水至稍其名曰封封之之際各隄口仍酌量留水一二分其名曰俵俗作表迨水已至稍乃開上流各隄口任其澆灌既足又逼令至稍封與俵周而復始上流下稍皆澆灌及時也唐渠貼渠原灌寧左右三衛及平羅所共三十四堡田地六千二頃有餘衛所各官分段

封俵一歲須輪灌數次乃獲豐收至於漢渠在唐渠之下左衛陳俊堡四道河口地方距唐渠口三十里地形低窪直迎河流水勢易入其渠口寬三十一丈深七尺五寸明汪文輝於漢壩堡距渠口十二里建石正閘一座計四空每空寬一丈閘外建石退水閘三座自正閘北至唐鐸橋名曰上段寬五丈深六七尺長六十五里自唐鐸橋西北至張政橋名曰中段寬四丈五尺深六七尺長七十五里自張政橋北至

殷家夾道稍止名曰下段寬三丈深五六尺稍末寬一丈長九十八里共長二百三十八里渠之東西兩岸共陡口三百六十九道原灌漑寧左右三衛所屬十八堡田地共三千八百二十七頃有餘後因開導西河水勢變遷何忠堡竟隔在河中各自開引小渠灌田三十餘頃今漢渠止灌漑十七堡田地共三千七百九十七頃有餘其挑挖封俵與唐渠一例此渠得水甚易而又稍短田少所以通利如故比年以來

唯唐渠淤塞過甚濱於廢棄居民雖紛紛借助於漢渠不過稍分餘瀝地之高者竟屢年荒蕪而漢渠亦因以受困職全細按唐渠之大病有三一苦於渠口之不能受水也相傳先年唐渠口下河中有一石子沙灘障水之勢以入渠厥後灘漸消沒河流偏注於東而渠口竟與河相背其入渠者不過旁溢之水耳水之入渠也無力遂往往有澄淤之患一苦於地渠之不能通水也唐壩以下自杜家嘴至玉泉營盡係

淤沙每大風起軌行堆積唐渠經由於此實為咽喉
向者以風沙不時旋去旋積遂相與名曰地渠蓋因
兩岸無湃與平地等故名之也此處自來不在挑濬
之列因循既久竟致渠底與兩岸田地齊平甚有渠
底高於兩岸田地者較唐壩閘底約高三四尺河水
汎漲時入渠之水非不有餘乃自入閘以來至此阻
梗由是旁灌月牙倒沙兩湖迨兩湖既滿然後溢於
渠內徐徐前行不知費幾許水力經幾許時日乃得

過玉泉橋也況有此阻梗水勢紆迴水未前行而挾
入之濁泥已淤積閘底數尺矣一苦於渠身之過遠
也水之入口者原自無多而又苦於咽喉之不利以
有限之水流三百餘里供數百隄口之分洩其勢自
難以遍給若遇河水減落則束手無策矣唐渠有此
三大病而又加以年年挑濬之法積弊多端如渠夫
渠草除紳衿優免外豪衿地棍及奸胥猾吏肆意侵
蝕每將百姓應納草束沙椿折收銀錢代為買備輸

納名曰包納草則多係朽爛椿則盡屬短小又巧立
名色隱射規避若橋梁若陡口倘有損壞俱屬官修
乃藉稱須人看守每處免夫草一二分名曰看丁又
曰坐免甚至徒杠亦有坐免有力盡為看丁即曰陡
口須人啓閉未聞天下橋梁俱須人看守也是渠夫
渠草祇為奸積之利窟而渠工已受病實多矣每年
興工之時並不查明某處淤塞某處阻梗量度工程
之輕重酌用夫役之多寡唐渠自口至稍止分三工

五段漢渠自口至稍止分兩工三段如某工舊例用夫五百名年年撥給五百某段舊例用夫三百名年年撥給三百工輕之處夫多怠玩工重之處夫實短少且催納顏料之役必故為遲延及時至工迫各段督工者即令挑渠之夫役採取顏料兩岸園林莊柳任其砍伐微論止半供渠工半充私橐額徵顏料盡被乾沒而所撥三百五百之夫亦止虛有其數而已渠道灣曲之處東岸高者西必低西岸厚者東必薄

以高厚者力逼水勢刷洗對岸也每年挑濬之法如夫一百名止有三四十名在渠內取土餘五六十名俱排列高厚岸上遞相轉運一鍬之土經七八人之手而對面低薄之岸必不肯加幫尺寸謂低薄岸底必有刷洗深溝恐因加幫撒土填塞以致高厚者愈增低薄者愈減是以每年有冲崩之虞或水由湃底鑽俗作潰或水由湃上漫俗作倒皆不肯加幫低薄所致也至渠夫則止由衛所經承派撥名曰安渠賄

囑者派之路近而工輕貧窮者派之路遠而工重且將一段之夫雜派數十堡之人聽其自赴工所管工者莫知誰何中有逃者報官查冊拘提往返動至半月而一堡之夫又分派數處必遠至百里或二百里以外使之奔走不遑更將撥夫單內故意填寫錯亂使之赴各工段自行查問總欲令民不得不致遲悞以便定取罰工又各工段設立委管渠長等役各五六人或七八人每人免渠一二分彼俱係用賄鑽營

充當者一到工所每人包折夫役一二十名不等更有豪矜地棍指稱旁枝小渠請討人夫多至五六十名少亦二三十名官必如數撥給實無一名赴彼所請之處伊等竟折錢分肥是以額夫雖一萬一千有零而在渠挑濬者僅可得半又率以老弱充數官司查渠止走大路沿途問夫在何處就彼查點委管渠長人等探知即雇附近莊農應名點後即散甚且預知官司到來令人夫於渠內挖土堆積如塙形以堆

土之高詐為挑挖之深使高低莫辨官司一見便誇
稱工好並不問及上段如何下段如何官司去後夫
役仍將所堆之土攤平渠內其運上高岸者不過數
十畝八段之內官司必由之處或挑挖數里其僻遠
不到之處亦夫役足跡之所不到也總因兩渠分為
八段每段必遠至數十里無一定之責成無一定之
程式而奸棍折去夫役因循延至一月遂相率而散
其未經挑挖者雖有十之六七祇謂工多夫少付之

無可如何渠道之淤塞實由於此職全於莅任之初
巡視渠工見漢渠口之上有一小渠名曰貨蘭渠寬
數尺長十餘里乃前任寧夏道管竭忠據居民所請
開濬者別引黃河之水灌田數頃職全上下相度見
河水直冲渠口而第苦於口低身小導引不得其方
莫能遠達乃謀諸司水王應龍請於本道欲借此渠
形勢另開一渠以助漢唐水力之所不逮本道謂此
渠曾奉前撫憲據士民呈請飭委惠安堡鹽捕通判

王惠民勘驗形勢甚有裨益後以工程浩大約計用夫萬餘一月尚不能竣又慮修理閘壩需費不貲遂爾中止吾有志久矣汝第力行之職全謂用夫不得其法雖數里亦覺艱鉅若量土以計工量工以計夫此數十里之渠計日可成渠若告成閘壩自易易也本道乃令職全與都司役用額夫距舊賀蘭渠口之上三里許直迎水勢另開一口至馬家莊地方引入舊渠而擴之使寬行三四里至陳俊漢壩兩堡之交

即棄舊渠而西引水由高處行以達於唐渠雖遠至數十里而莊園墳墓皆繞以避之毫無所傷其所損田畝盡為除厥差徭居民莫不懽忻樂役於四十七年九月初七日興工至十三日渠成十五日本道親詣渠口開水不崇朝而徧注田間自來高亢之地一旦水盈阡陌婦女孩童咸出聚觀驚喜之狀若有意外之獲其渠口上距唐渠口二十五里下距漢渠口五里乃右衛唐壩堡所屬剛家嘴地方口寬八丈深

五尺渠身長七十五里二分上三十里寬四丈深六
七尺下三十里寬三丈五尺深五六尺稍末十五里
二分寬一丈六尺深五尺東西共陡口一百六十七
道灌溉陳俊蔣鼎漢壩林臯瞿邵剛玉泉李俊宋
澄九堡田地共一千二百二十三頃有餘至宋澄堡
地方仍匯入唐渠本道以此渠閱十數年聚議止為
道旁之築者今告成於七日且相度形勢較王惠民
向所勘驗引水更易不覺喜形於色謂移此用夫之

法以修唐漢兩渠不難坐令各渠疏通也於是於四十八年竟以此渠開之憲臺當蒙倡捐俸資於陳俊堡地方建石正閘一座計兩空每空寬一丈閘外建石退水閘三座工既成蒙命其閘曰

大清閘渠曰

大清渠職全復於閘上建橋房五間左側建遊亭一所其規模竟與漢唐兩壩鼎峙矣此建閘之處乃舊貼渠經由之地貼渠較清渠高六尺有餘竟為清渠截

斷職全乃造木筧置諸閘後兩旁石牆之上中更用大木架之傍橋房之欄以渡貼渠之水自西而東筧寬四尺長三丈名曰過水此不特貼渠無傷而閘上閘下水流交錯波聲互應風景殊有可觀也彼陳俊等九堡田地乃素用唐渠之水者清渠既成則不須唐渠灌溉其入唐渠之水可使之直趨而下而所省灌溉九堡之水實足以補唐渠水利之不足不患渠身之過遠矣况清渠餘水匯入唐渠者又能大助其

勢耶唐渠之病去其一至於唐渠口則於黃河內築迎水湃一道用柳固數千內貯石子排列兩行中間用石塊柴草填塞上復用石草加疊過於水面更用大石塊襯其根基其湃寬一二丈高一丈六七尺不等自觀音堂起至石灰窰止共長四百五十餘丈逆流而上直入硤內中劈黃河五分之一以為渠口口寬至二十餘丈較舊渠口約高數尺挽河流東注之勢逼令西折入渠是迎水湃之力已能逆水使之高

束水使之急吞噬洪流勢若建瓴不患澄淤矣而口
又加寬受水實多渠內之水賴以倍增唐渠之病又
去其一歷年不挑之地渠則多用夫役挑濬使之低
於閘底以通水路兩旁復立高厚岸使渠流至此
得以疾趨不致繞道於湖水行既疾則沙隨水走莫
能淤積唐渠之病又去其一由是口內洋溢咽喉無
阻向之唐渠以有限之水灌溉三十四堡田地常慮
不足者今以有餘之水又省九堡之分洩止灌溉二

十五堡自無不充裕矣不須借助於漢渠而漢渠亦並受其益矣至若奉委協助都司批濬各渠則草盡從前積弊唯以新渠用夫之法為例於清明興工前一月將漢唐各渠自口至稍逐細查丈更用水平量其高低如某處渠道淤塞應挖深若干寬若干某處湃岸低薄應築高若干厚若干某處工重應用夫若干某處工輕應用夫若干預造一工程冊乃以額夫合算除修理閘壩迎水及各大枝渠用夫若干外計

挑挖唐漢

大清各渠實止夫若干於是量土派夫每夫一日以挖方一丈深三尺為率夫數既定乃自下而上挨堡順序如威鎮堡在唐渠之稍該堡額夫若干名以土合算應挖若干里即定以里數分立界限開明寬深丈尺令從稍末挖起至分界處接連即用平羅堡之夫又接連即用周澄堡之夫餘俱逐堡順派以近就近各照分定界限挑挖其夫即用本堡堡長督率每工

開一丈尺細單務令挑挖如式挑挖之土俱令加疊
低薄湃岸高厚之處不許妄排多人致妨正工其枝
渠之大者俱度量工程撥給夫役但往歲於各堡中
混派今則止令受水之民自行挑挖夫數或稍減於
舊額而用工則不啻數倍至十餘里及三五里之小
枝渠即算入正渠工程之內一併挑挖不另撥夫役
以杜隱射包折之弊職全復每日於渠身內往返巡
查如某堡分工幾里其挑挖不合單開丈尺致渠底

不平或低薄之岸疊築不堅即責究堡長工程無包折之弊夫役無遠涉之勞而逐段皆有責成皆有程式自相率盡力不敢怠玩況興工之後復蒙憲臺遣標下守戎王捷督查其工又蒙廉察壩草六十一萬不無侵漁時對半減免三十萬有餘民間有田一分舊例納草四十八束者今止納二十四束以是寧民踴躍趨事爭先恐後各渠疏通無阻泮岸又極堅固所以立夏開水之日黃河水不加增而每年開水月

餘水不能到稍者今不過四五日稍末即澆灌徧足
矣鎮城以北往年不沾涓滴者今且徧種稻稗矣寧
鎮各渠之情形及修濬之利弊如此此皆差員王捷
所目擊者也獨是職全革弊太盡立法太嚴委管渠
長盡遭革除豪衿地棍勢難包折隱射之弊俱為清
出枝渠之夫不能分肥而奸胥猾吏歲歲恃渠工以
填豁壑者今且無所施其巧是數萬生靈雖云受利
而積年奸宄未免側目矣竊思古人之於渠務額設

有夫力役有期物料有備分五工八段使各盡其力
立法何嘗不善迄於今非徒無益而又害之總皆趨
利之輩作弊於所忽壞法於不覺竟使利民者反以
累民古人立法之美意泯沒殆盡職全亦何人斯安
保其所立之法不即壞於旋踵耶伏乞嚴飭司水利
者每年以去歲春工為例而再為神明變通於其間
不使已效之法復致更張已通之渠復致淤塞憲恩
直與河流並永矣

說

明劉紹周褒斜同谷說 古今志褒斜者皆謂南北同
谷惟何氏雍大記不然謂自秦入蜀有三谷四道西
南曰褒谷南曰駱谷從洋入東南曰斜谷從郿入其
棧道有四出從成和階文出者為沓中陰平道鄧艾
伐蜀由之從兩當出者為故道漢高帝攻陳倉由之
從褒鳳出者為今連雲棧道漢王之南鄭由之從城
固洋縣出者為斜駱道武侯屯渭上由之此四道三

谷余未履其地但就其所分疏求之夫既以駱谷為
南則斜谷當在西南且斜駱二谷地望各異何得概
稱一道為武侯屯渭所經由耶蓋褒谷在蜀漢西北
不得為自秦入蜀之路若從秦川言則南曰駱谷在
盤屋西南為郿則斜谷耳乃訛西南曰東南將以郿
在盤屋之東乎哉故程大昌述高帝之入關也正月
羽封沛公為漢王都南鄭封秦將章邯為雍王都廢
邱四月漢王入蝕中至南鄭蝕中不見地書以地望

言關中南面碍山不可直達其有微徑可達漢中者
惟子午關在長安南次西有駱谷關又西則褒斜也
此蝕中非駱谷則子午耳若大散則在西南不與咸
陽對出非其地矣其年五月漢王引兵襲雍則自褒
斜出蓋雍之陳倉也漢兵既出章邯走廢邱遂定雍
縣東園廢邱邯自殺復遣樊噲周勃引兵下郿安得
謂駱谷在南而斜谷又在東耶又按鄭氏地理畧當
蜀魏時陳倉東北十五里為郿城亮攻陳倉不拔又

攻郿不能克乃引還國志雖無其文而漁仲博雅必
有所本則高帝後亮亦攻陳倉及郿而不獨屯渭上
由斜駱道矣蓋駱谷出扶風隔南山中有三嶺一曰
沈嶺近芒水在鰲厓一曰衙嶺一曰分水嶺固郿斜
谷水所從出以入渭者也乃知斜駱二谷在南山中
其脉勢實相联接緣本著末則郿與鰲厓皆有駱谷
而雍大記乃統稱斜駱道云所以記事者又有元僖
西幸由斜谷之說見於柳氏舊聞及張彭耆舊傳

辨

明俞安期崑崙積石二山辨 按後漢書志郡國云臨
羌有崑崙山班固漢書志地理其金城郡臨羌縣下
疏云西北有西王母石室仙海鹽池西有弱水崑崙
山祠至唐而吐蕃自云崑崙山在其國中長慶中劉
元鼎使吐蕃稱三山中高四下曰紫山古所謂崑崙
亦曰閼摩黎山潘昂霄黃河志云吐蕃朶甘思東北
鄙有雪山即崑崙明洪武三年西平侯沐英九年征

西將軍鄧愈追羗人至此山咸云崑崙是昉於涼張
駿時馬岌傳會之言也馬岌為涼酒泉太守上言酒
泉南山即崑崙周穆王見西王母謂此山宜立西王
母祠以裨朝廷無疆之福駿從之西王母既祠厥後
范曄遂以崑崙載之臨羗而疏班固地理志者亦約
曄書張大之酒泉之南山非臨洮之西北乎然禹本
紀云河出崑崙崑崙高三千五百餘里日月相避隱
為光明也其上有醴泉華池去嵩高五萬里地之中

也龍魚河圖云崑崙山天中柱也水經云崑崙墟在西北去嵩高五萬里河水出其東北阨淮南子云高萬一千里有竒上有木禾珠樹沙棠琅玕在其東絳樹在其南碧樹在其北佛圖西域志云阿耨達大山其上有大淵水即崑崙山康泰扶南傳云天竺恒水之源乃極西北出崑崙山穆天子傳云天子自崑崙山入於宗周里西土之數自宗周瀍水以西至于崑崙側瑤池上萬有一千一百里酈道元注水經按是

數說參以山海經謂里至互殊難以詳究蓋考之山海經而不悟崑崙有海內大荒之別也山海經之海內西經云海內崑崙之墟在西北帝之下都方八百里高萬仞百神之所在河水出其東北隅入禹所導積石山郭璞注云言海外復有崑崙山又山海經之大荒西經云西海之南流沙之濱赤水之後黑水之前有大山名曰崑崙之丘其下有弱水之淵環之其外有炎火之山有人戴勝虎齒有豹尾穴處名曰西

王母是有二崑崙焉蓋穆天子所登山海經所謂海
內之崑崙班固西域傳所載南北有大山中央有河
東西六千餘里南北千里東則接漢阨以玉門陽關
西則限以葱嶺計其里至度其在所是介葱嶺于闐
之間矣葱嶺以西為天竺國又西有大崑崙是為天
柱是為地中山海經所謂大荒中之崑崙西域志所
謂阿耨達大山禹本紀水經所謂去嵩高五萬里水
經所謂河水出其東北阨屈從其東南流入于闐是

其重源也張騫尋河源至于閼葱嶺以為河源而司
馬遷遂有烏覩崑崙之論不信大禹本紀山海經之
載又言九州山川尚書近之獨不覩尚書亦有織皮
崑崙析支渠搜之紀乎又水經載河水由葱嶺逕西
域十三國而注泐澤班固西域傳云河有葱嶺于閼
兩源合而東注蒲昌海一名鹽澤即泐澤也去玉門
陽關三百餘里廣袤三百里其水冬夏不增減潛行
地下南出積石山為中國河范曄云西域內屬諸國

自玉門陽關西至葱嶺六千餘里其紀河源同夫漢
自燉煌西至鹽澤列起亭障戍已校尉屯于車師都
護之府置于烏壘介西域之中督察動靜是葱嶺于
閩之流入于蒲昌漢之官卒目所經見班固記之諒
非繇邈計度之辭水經所載十三國酈道元亦引固
書入證往往脗合是非誕妄至云鹽澤之水洄湍電
轉為隱淪之脉當其環流飛禽上經無不墜之是即
河水所潛出於積石亦豈臆造由漢以來彰彰較著

嗣後唐咸亨元年薛仁貴征吐蕃敗績大非川二年
乃以河關靜邊鎮置積石軍久之遂訛河關兩山夾
峙河出其間者為禹貢所導之積石矧又輔以馬岌
西王母之祠范曄臨羗之紀崑崙旣在河關之上蓋
為積石明證矣水經云河水南至積石山下有石門
河水冒以西南流酈道元謂之重源東方朔十洲記
云崑崙南接崑崙圃實崑崙之支輔與水經南至積
石山之文合山海經云積石之山其下有石門河水

冒以西南流萬物無不有郭璞注云山在金城河關
縣西南羗中後漢書云段熲為護羗校尉追燒當羗
北鬪且行割肉餐雪四十餘日遂至河首積石山出
塞二千餘里隋置河源郡積石鎮命劉權鎮之統遠
化赤水二縣在古赤水城又在曼頭城西宇文述追
破吐谷渾處所謂得地東西四千里南北二千里置
郡縣鎮戍徙天下輕罪居之者也注云有積石山河
水所出又有烏海貞觀中詔李靖侯君集等西征吐

谷渾軍次鄉州始議所向後戰于曼都山窮追出塞
登漢哭山復戰于烏海破天柱部於赤海君集建宗
行空荒之地二千里乃次星宿川達柏海上望積石
山觀河源自是以上曷嘗言積石在河關也唐置軍
而更名積石借其嘉稱猶之征吐谷渾近在青海而
以君集等為積石道鄯善道赤水道且末道鹽澤道
也豈實隸其地耶置河源軍於鄯城縣又非河源郡
之故地蓋可證也逮至開元中張守節作史記正義

云河州有小積石山河源出大崑崙入鹽澤東南潛行入吐谷渾界大積石山又東北流入小積石山指河源所出者為大崑崙似以臨羗山為小崑崙矣又以河源關為小積石吐谷渾界者為大積石其名迹未盡混也肅代之季吐蕃據有河湟中外隔越既易五朝歷數十年邈無經載長慶中劉元鼎使吐蕃胡怪乎以關為積石紫山為崑崙以積石冒出之流星宿川為河源也而杜佑之通典歐陽元之潢記馬端

臨之通考以至鄧展都實潘昂霄輩不悟置軍名所
由起寢假相延遂堅執元鼎之說極詆山海水經以
及班固郭璞酈道元之儔嗚呼曲士拘儒經見不廣
及於知識未逮者輒為荒唐誠諺所謂少所見多所
怪妄鼓筆札而令前人之與古蹟受誣千載直如長
夜至於昂霄之志一行奉為指南而明朝按河關者
建立禹廟祀在有司積石之訛益莫可辨崑崙之墟
終古不移深可慨惜矣客有難予者曰尚書崑崙析

支差次叙之所在相去似不應遙後漢書稱金城之西南濱于析支則臨羗之有崑崙獨不可以理推之而乃信不可知之載牒以置辨乎余曰不然水經云河自朔方東轉逕渠搜北蓋渠搜在今榆林北析支渠搜亦差次叙之相去大遠又析支即河曲羗所居蓋都實所稱九渡水是已又稱由九渡至崑崙行二十六日程河始行崑崙南經叙崑崙在析支之上又豈應山在析支下哉蒲昌之水潛出積石既有經證

于漢而崑崙流入慈嶺獨無是理乎矧尚書亦稱道
沅水東流為濟湓為滎東出于陶邱沅水亦既潛而
復見尚書亦詭誕矣余賦黃河悉陳羣籍究其源委
會通其故乃備列之以發千百年之覆云

皇清武全文涇源辨 案地志涇水出原州百泉縣筭頭

山山海經則曰數厯山之西百五十里曰高山涇水
出焉考高山在平涼郡西水由瓦亭川而東筭頭山
在平涼西南下有百泉流為涇皆滙于郡城之西數

里如以地志為據則百泉為源高山為支以山海經
為據則百泉為支高山為源兩說並存則涇水南北
有二源與汭同矣揆二水之形百泉諸水大倍于瓦
亭川水經小水入大水以大納小不以小納大則涇
源當在笄頭以地里計之高山距平涼一百二十里
地頗遠笄頭距平涼四十里地較近其瓦亭居空同
之西北笄頭出高山之東南似又不當以遠者為支
近者為源下者為源上者為支也無已則隨山而度

其勢循流而考其源百泉之水由空同而東下山環水湧其勢澎湃於勢為最順高山之水西出瓦亭川地遠流細北亂于涇勢則少逆矣後世述河源者曰崑崙又曰星宿海涇之大也不及河而達于河涇源人稱百泉者謂其離奇湍瀉不可狎視幾與星宿海同禹貢涇水兼屬渭汭綿亘八百餘里為雍梁之間巨浸則其發源必有神靈瑰異非常之觀高山諸流固不可與百泉深廣同日而語也故山海經雖出于

前而紀涇源者必毅然屬筭頭禹治水必隨山順其
勢也禮祭海者必先河神其源也然則山海經稱涇
水出高山何以故曰高山支接終南原本太華雄峙
隴山西北筭頭密邇高山視之如太山培塿然故志
山者舍卑而從高猶志水者舍小而從大統筭頭於
高山而涇水因之朱子注汧源曰吳山義固與高山
同也

武全文汧源辨 後世稱汧水者以誤沿誤千載滋

疑止緣朱子註詩汧水出吳山西北蔡氏註禹貢出
弦蒲藪之西北遂不復詳察其地而以隴州汧源縣
為汧水之源今考隴州諸水皆由汧入渭不與涇通
此不待辨而知其與汧無涉也惟吳山弦蒲藪二說
先儒抑豈無據而妄稱之考古志華亭有隴山有汧
水紀載甚確則汧水出華亭固無疑矣吳山即隴山
華亭與隴州山連壤接界內諸山皆屬隴又曰小隴
山且唐宋之際縣舊屬隴尚未入平涼也則朱子所

稱吳山西北安知不在華亭境內而必執隴以問汭
耶載考弦蒲數在今隴州蒲峪是汭隴之西數也而
其西北即為華亭西山是蔡氏之說亦非刺謬後人
不深考西北之義誤以汭水為汭則泥古所致不審
于禹貢汭屬汭渭及公劉芮鞠之即果何所解也是
不可不辨

考

皇清達禮善涇渭考 水利者民事之所急也自周起西

陸歷秦漢至唐關中遂為建都之地名山大川歷歷可數而渭清涇濁君子存鑒別之思焉按周官雍州其浸渭洛為關中三川周幽王時三川震是已涇渭二水合灃滻滂瀉瀉又謂關中八水渭水出隴西首陽縣烏鼠同穴山東北過狄道縣南上邽縣北陳倉縣南武功縣北槐里縣南與滂瀉二水合東至高陵與涇水合又與漆沮水合至潼津入河尚書所謂導渭自烏鼠同穴東會于瀉東會于涇又東過漆沮

入於河是也涇水出安定朝那縣西開頭山東南經興平扶風至京兆高陵縣而入渭與渭水合流三百里清濁不相雜東合漆沮水亦自潼津入河禹貢所稱導渭自鳥鼠同穴又東會於涇又云涇屬渭汭是也二水之所自出者如此詩云文王初載天作之合在洽之陽在渭之涘文定厥祥親迎于渭又云我送舅氏曰至渭陽何以贈之路車乘黃三輔舊事云秦都渭北渭南作長樂宮橋表河為秦東門表汧為秦

西門二門相去八百里渭水貫都以象天河橫橋南渡以象牽牛漢都渭南開北闕以臨渭渭北則陵廟所在史記云太公釣渭周西伯將獵卜曰所獲非龍非螭非熊非羆所獲霸王之輔於是西伯獵果遇太公於渭之陽與語大悅又云漢文帝十五年趙人新垣平以望氣見因說上設立渭陽五帝廟欲出周鼎又云張釋之為廷尉文帝出中渭橋有一人從橋下走出乘輿馬驚使騎捕屬廷尉陳壽益都耆舊傳云

漢武帝時蜀張寬為侍中從祀甘泉有女子浴渭水
乳長七尺上怪遣問之女曰帝後第七車知我所來
寬在第七車對曰天星主祭祀者齋戒不潔則見渭
水之見於經史者如此詩云渭彼涇舟烝徒楫之左
傳晉侯伐秦帥諸侯之師以進濟涇而次秦人毒涇
上流師人多死史記秦二世夢白虎齧其左驂卜涇
水為祟二世乃齋望夷宮欲祠涇後漢章帝北巡下
長平御池陽宮東至高陵造舟至於涇而還涇水之

見於經史者如此而涇渠之利最大先是秦數伐韓
韓命水工鄭國說秦鑿引涇水令秦師不得東伐秦
覺欲殺之國曰為韓延數歲之命耳然渠成亦秦之
利也於是秦令國卒成其功溉田四萬餘頃名曰鄭
渠漢元鼎間左內史兒寬因鄭渠旁有田高不及溉
者奏請開六輔渠以溉之趙中大夫白公又穿渠引
涇水首起谷口尾入櫟陽注渭中二百里溉田四千
五百頃因名曰渠人歌之曰田於何所櫟陽谷口鄭

國在前白渠起後舉錨為雲決渠為雨涇水一石其
泥數斗且溉且糞長我禾黍衣食京師億萬之口嗣
後宋大觀中有豐利渠元至大間有王御史渠明成
化中巡撫項忠又有廣惠渠渠名數更要之皆發源
鄭國耳二水一清一濁各稟天地自然之氣無容勉
強且皆足以備亢旱濟農功開億萬年民事之利非
若君子小人判然有薰蕕冰炭之異也然易之道以
陽畫為君子陰畫為小人陽則輕清而象天陰則重

濁而象地所謂君子小人者特其象耳渭水之清非真有勝於涇而其象有似乎君子涇水之濁非真有遜於渭而其象有似乎小人君子所以起鑒別之思者此也

跋

宋曾鞏西狹頌跋 武都太守漢陽阿陽李翕字伯都
以郡之西狹閣道通梁益緣壁立之山臨不測之谿
危難險峻數有顛覆貫墜之害乃與功曹吏李旻定

筭勅衡官掾仇審治東坂有秩李瑾治西坂鑿燒大石改高即平正曲廣阬既成人得夷塗可以夜涉廼相與作頌刻石其頌有二其所識一也其一立於建寧四年六月十三日壬寅其一是年六月二十日立也又稱翕嘗令澠池治峭嶽之道有黃龍白鹿之瑞其後治武都又有嘉禾甘露木連理之祥皆圖畫其像刻石側蓋嘉祐之間晁仲約質夫為興州還京師得郾閣頌以遺余稱析里橋郾閣漢武都太守李翕

字伯都之所建以去沉淪之患而翕字殘缺不可辨
得歐陽永叔集古目錄跋尾以為李翕余亦意其然
又熙寧十年馬中玉為轉運判官於江西出成州所
得此頌以示余始知其果為李翕也永叔于學博矣
其于是正文字尤審近士大夫喜藏畫而漢畫則未
有能得之者及得此圖所畫龍鹿露木嘉禾然後漢
畫始見又皆出於石刻邨閣立於建寧五年然一西
狹邨閣之道有益於人而史不傳則頌之作其可備

史之闕與

墓表

漢馮奉世趙壯侯墓表 永光二年秋八月奉世承命
擊逆羌道出隴上騎都尉趙卬侯謁狀父行請表鳴
呼茲世友趙翁孫墓也翁與世有刎頸交表其行事
以風來世固世心也亦世職也敢以不文辭先生諱
充國字翁孫世居隴西上邽人也曾祖諱真秦為隴
麋令祖諱巖皐高后朝拜校尉父諱破奴後元時為

材官元封間以擊樓蘭功領前將軍太初戰歿三年
己卯先生以材名見知貳師將軍從征宛城補校尉
領護西域輪臺渠犁田卒事天漢二年冬匈奴圍貳
師於酒泉先生督壯士百人潰圍陷陣身被二十餘
創遂解貳師圍詔徵詣行在所帝親視瘡嗟嘆良久
拜中郎將征和四年罷輪臺亭隨詔回拜護軍都尉
元鳳三年烏桓反大將軍欲邀擊問先生先生曰匈
奴擊之於漢使我今發兵邀擊招寇生事非計也後

共捕上官功拜中郎將車騎將軍元平秋大將軍捐
館先生識霍氏微絕交及霍氏敗連坐者千計先生
不與焉元康間匈奴弱上欲出兵擊右地先生首倡
不可擊之策帝意未釋及丞相書進始罷謀三年先
零諸羌叛先生謀方畧諭安國及至西域違算羌侯
楊玉怨怒背畔先生年已七十有六矣上老之使御
史大夫問將先生曰無踰老臣復問卒數先生曰兵
難階度願馳至金城圖上方畧羌戎滅亡不久陛下

勿以為憂上笑賜後將軍印祖餞西行先生詣金城
以遠斥堠為務行為戰備止堅營壁持重愛士先計
後戰遂至西部欲樹恩威招降罕开辛太守首建急
攻之策上從先生計罕开竟不煩兵而下度先零勢
必敗壞罷騎兵留步卒屯田隄中以待其斃乃上留
田便宜十二事及封事以聞每上輒下議初是十三
中十五終十八上從之二年夏五月先生振旅班師
糧卒不煩而羗戎自破封營平侯居京邸每有大議

上親問籌策無何乞骸骨上賜安車駟馬黃金白玉
歸第上後思股肱之美圖像麒麟閣家居八載杜門
謝客不植私交不積鎰重諭子以勤儉嘗曰無奢縱
霍氏鑒也易簀之日則曰安國家靜西戎吾事畢矣
為吾後者能以禮物身謹守家門瞑目甘矣生於武
帝建元四年夏六月卒於宣帝甘露二年夏四月年
八十有六葬邽山之陽嗚呼惜哉先生剛直沉勇有
方畧配楊氏生子二卬其長也卬其次者孫曰汲女

曰蘭適魏丞相公子先生歷事三朝奉職惟謹廟堂
謀議邊務經畧靡不精確不但為中興良將亦堪為
救時賢相諡曰壯豈過情哉茲其概也奉世所共覩
者謹掇之以表諸墓俾作傳者採焉

唐張九齡牛意仁墓銘 公諱意仁字行恭殷後有牛

父者宋大夫邨為護羗校尉崇為隴西主簿因官安
定爰處鶉觚為郡人公之族祖竒章公隋宗臣天下
稱之大父通秉志守道交辟不起父會弱齡早代公

考槃丘園屢空晏如或勸之仕但笑而不語開元六年隨子西征就養終于伏羌官舍時年七十有六冬十一月歸葬北原夫人同郡王氏先卒有子仙客官銀青光祿大夫太僕卿判梁州持節河西節度使兼隴右羣牧支度營田採訪處置使攝御史大夫隴西縣開國子以子貴贈公使持節涇州諸軍事涇州刺史夫人追封太原郡夫人銘曰隴上多豪山西好武使君貞獨幼不斯取惟道與徒與代立矩善有餘慶

風亦變古不學而能不行而至跡有相混名無自異
出入百年終始一意福流于後神明其事行止於身
用存元體厥子嘉績中朝縟禮印迴壠遂門重旌棨
逸人之墓今同郡邸

宋范仲淹种世衡墓銘 君諱世衡字仲平國之勞臣
也不幸云亡其子泣血請於予予嘗經畧陝西知君
最為詳懼遺其善不可不從而書之初康定元年春
夏人犯延安我師不利朝廷以保障衆多有分兵之

患其間遠不足守者即命罷之寇驕而貪益侵吾疆
百姓被其毒君時為大理丞任鄜州從事建言延安
東北二百里故寬州請因廢壘而興之以當寇衝
左可致河東之粟右可固延安之勢北可圖銀夏之
舊有是三利朝廷從之以君董役事君膽勇過人雖
俯逼戎落曾不畏憚與兵民暴露數月且戰且城然
處險無泉議不可守鑿地百有五十尺始至於石工
徒拱手曰是不可井矣君曰過石而下將無泉耶爾

攻其石屑而出之凡一畚償爾百錢工復致其力過
石數重泉果沛發飲甘而不耗萬人歡呼曰神乎雖
敵兵重圍吾無困渴之患矣用是復穿數井兵民馬
牛皆大足自茲西陲保障患無泉者悉倣此大蒙利
焉既而朝廷署故寬州為青澗城授君內殿承制知
城事復就遷供備庫副使旌其勞也塞下多屬羗尙
時將帥不能思信羗皆持兩端君乃親入部落申勞
問如家人意多所周給常自解佩帶與其賢豪可語

者有得敵中事來告於我君方與客飲即取坐中金
器以獎之屬羗受服皆願効死青澗東北三舍而遠
距無定河河之北有敵寨敵常濟河為患君屢使屬
羗擊之往必破走前後取首級數百牛羊萬計未嘗
勞士卒也故功多而費寡建營田三千頃歲取其利
募商賈使通其貨或先貸之本速其流轉歲時問其
息十倍乃建白凡城中芻糧錢幣暨軍需城守之具
不煩外計一請自給愛養士卒病者遣一子視其湯

餌常戒以笞責期於必瘳士卒無不感泣今翰林承
旨王公堯臣安撫陝西言君治狀上悅降詔褒之曰
邊臣若此朕復何憂二年就兼鄜延路駐泊兵馬都
監制置本路糧草遷洛州副使慶歷二年春予按巡
環州患屬羗之多而素不為用與夏人等相助為邊
患乃召蕃官慕恩與諸族君長犒於城下與之衣物
繒綵以悅其意又採忠順者增銀帶馬紱以旌之然
後諭以好惡立約束而俾之遵向然悍猾之性久失

其馭非智者處之慮復為變時青澗既完人可循守
乃請於朝願易君理環朝廷方以青澗倚君又延帥
上言人重其去命予更擇之予謂夏人日夜誘吾屬
羗羗愛其類益以外向非斯人親之不能革其心朝
廷始如其請君既至環安邊之利病大要在屬羗難
制懼合夏人為暴發之患又地瘠穀貴屯師為難聚
糧則力屈損兵則勢危斯急病也君乃周行境內入
屬羗聚落撫以恩意如青澗焉有牛家族首奴訛者

倔強自處未嘗出見官長聞君之聲始來郊迎君戒
曰吾詰朝行勞爾族奴訛曰諾是日大雪三尺左右
曰此羗亮詐嘗與高使君繼嵩挑戰又所處險惡大
雪非可前君曰吾方與諸羗樹信其可失諸遂與士
衆緣險而進奴訛初不之信復會大雪謂君必不來
方坦卧帳中已至盛而起之奴訛大驚曰我世居此
山漢官無敢至者公了不疑我耶乃與族衆拜伏額
手曰今而後惟父所使自是屬羗咸服於君有兀二

族受夏戎偽署君遣人招之不聽即使慕恩出兵誅之死者半歸者半盡以其地暨牛羊賞諸有功其僭受偽署如兀二族者百餘帳咸股慄請命納其所得文券袍帶由是屬羗無復敢貳君戒諸族各置其烽火夏戎時來抄掠則舉烽相告衆必介馬而待之破賊者數四涇原帥葛懷敏定川之敗戎馬入縱於渭予領慶州蕃漢兵往扼邠城又召君分援涇原君即時而赴羗兵從者數千人屬羗為吾用自此始君曰

羗兵既可用矣乃復教土人習弧矢以佐官軍吏民
有請某事辭某事者君咸使之射從其中否而與奪
之坐過失者亦用此得贖吏農工商無不樂射焉由
是緣邊諸城獨環不求增兵不煩益糧而武力自振
夏戎聞屬羗不可誘土人皆善射烽火相望無日不
備乃不復以環為意前後經畧使交薦君之才能朝
廷益知可倚明年遷東染院使充環慶路兵馬鈐轄
仍領環州西南古原州之疆有明珠滅臧康奴三種

居屬羗之大素號強梗在原為孽寢及於環撫之狠
不我信伐之險不可入北有二川交通於夏我朝廷
患焉其二川之間有古細腰城復之可斷其交路又
明年予為宣撫使乃諭君與原守蔣偕共幹其事君
久悉利病即日起兵會偕於細腰使甲士晝夜築之
夏我固忌此城君遣人入敵中以計歛之兵遂不至
又召明珠等三族豪長犒撫之俾以禦寇彼既出其
不意又無外援因而服從君之謀也君處細腰月餘

偁以苦寒城成而疾作慶歷五年正月七日甲子啓
手足神志不亂享年六十一葬於京兆萬年縣之神
和原君之先河南洛陽人也曾祖存啓河南壽安令
祖仁諱京兆長安令贈太常博士父昭衍登進士第
累贈職方員外郎季父放字明逸初隱於終南山君
少孤依之服勤左右以力學稱明逸道高德純太宗
朝再召以事親不起真宗復加聘禮起拜左司諫直
昭文館累遷尚書工部侍郎大中祥符五年君用工

部廕得將作監主簿五遷至太守中舍初監秦州太平監以母老求養又監京兆府渭橋君邛州惠民監知涇之保定京兆之武功涇陽三邑在武功毀淫祠崇夫子廟以來學者在涇陽有里胥王知謙者姦利事露逃之逼郊禮乃出君曰送府則曾恩益以長惡從所坐杖脊於縣庭而請待罪府君李公諮奏釋之自是豪黠莫不歛手其嫉惡如此又邑有三白渠比年浚疏用數邑力主者非其才而勞逸弗等功利日

削君使勤惰齊其力故功倍貧富均其流故利廣至
今民能言之歷通判鎮戎軍環鳳二州鳳之守王蒙
正托章憲外姻以私干君復欲以賄汚君君正色不
納蒙正大怨之乃使人諭王知謙訟君蒙正內為之

助獄成流賓州上親政量移汝州君之弟世材以一
官譴君乃除孟州司馬龍圖閣直學士李公絃雪於
朝授衛尉丞主隨州榷酤又禮部尚書宋公綬工部
侍郎狄公棐皆言君非辜改知虔州贛縣君辭得監

京兆軍資庫以同鄜交辟改僉署同州判官事又移
鄜州因從軍延安乃有故寬州之請君少尚氣節昆
弟有欲析其家者君推資產與之惟取季父圖書而
已蒞官能摘惡庇民青澗與環人皆畫君之像而享
事之及終吏民暨屬羗豪長朝夕臨柩前者數日朝
廷深惜之賜三子恩君娶劉氏封萬年縣君男八人
長曰詒文雅純篤養志不仕有叔祖明逸之風次曰
診試將作監主簿曰詠同州澄城尉曰詒郊社齋郎

曰諤三班奉職皆有立訢記誼三子尚幼一女適西
頭供奉官田守政君在邊數年聚貨食教孤矢撫養
士伍牢籠羗夷無賢不肖皆稱之又出奇以濟幾事
嘗遣諜者入敵中凡半歲間而羗誅握兵用事二三
人謀者還言某謀得行會君已沒又天子方事懷來
故其績不顯銘曰嗚呼种君出於賢門吾志必立吾
力是陳寧以剛折果由直伸還自瘴海試於塞垣權
以從事意其出入捍羗之患又邊之民夙夜乃職星

霜厥身生則有涯死宜不泯邊俗祀之子子孫孫

張舜民游師雄墓銘 游本姬姓吉興於鄭元魏靖

侯儒風聿修悠悠千禩典型孰繼公生陝州文武之

器文則華矣其武伊何矢謀於軍書勞實多在昔熙

寧鬼章方命先帝不誅以待嗣聖武功繼明公初請

纓指蹤將士機發雷霆既破洮州仍執強虜告慶廟

陵百寮蹈舞窮髮鬼區誓我皇武桓桓奇功焜燿海

寓乘軺關隴剖竹蒲幽省曹卿寺出入拖紳忠以利

國仁以愛民其所施設同風古人憬彼夏羗屢鬪西
境公提將符岳立山挺忽徙一邦志不獲騁乃令強
梁尚保要領大勲不遂非公獨然廉頗去趙樂毅離
燕惟有令名炯如星懸刻銘幽宮萬世哀焉

胡世將開府儀同三司贈少師吳玠墓誌 紹興九
年春三月開府儀同三司吳公以寢疾奏乞謝事天
子惻然憂之命四川安撫制置使成都守臣世將訪
善醫治疾又馳國醫往視公以六月己巳薨於軍享

年四十有七七月遺表聞上震悼輟朝二日贈公少師凡恤典悉加厚其弟璘與諸孤奉喪歸葬於德順軍水洛城北原先塋之次十一月上念公之已葬詔有司賜錢三十萬擢璘繼龍神衛四廂都指揮使以慰卹其家恩義備矣蓋自天下用兵乘輿省康吳會公以偏師起西鄙奮孤忠抑大難保川陝共五十六州以重上流之勢屏翰王室屹如長城方敵國深侵叛臣僭竊道路阻絕公未嘗得一見天子歎其精忠

上達聖主明見萬里之外謂公可屬大事當方面凡
軍事不從中御而賞罰付之不疑以卒成却敵固圉
之功者惟天子之明而公之忠也諸孤以行狀來請
謹序而銘之吳氏出秦伯之後以國為姓自季札避
位其子孫家魯衛之間厥後散處四方雖譜牒遺逸
不可盡考而起守西河芮國長沙漢封廣平皆本德
義尚忠實為世良將而公天挺英奇崛起數千載之
後赫然功名與之俱盛迹其流風餘烈盖有自焉公

曾祖諱謙贈太子太保李氏永寧郡夫人公考諱扈
贈少保劉氏嘉國夫人自少保而上世居德順以公
貴追榮三世公諱玠字晉卿少沉毅有志節善騎射
知兵法讀書能通大義未冠以良家子隸涇原軍政
和中夏人犯邊力戰有功補進義副尉稍擢隊將從
討浙西賊方臘破其衆擒酋長一人及擊破河北羣
盜累功轉忠訓郎權涇原第十將夏人攻懷德軍公
以百餘騎突擊追北斬首級百四十有六轉秉義郎

擢本路第二副將自是威名益震建炎二年金人內
侵已三載矣渡河出大慶關畧秦雍所過城邑輒下
自鞏州至鳳翔隴右都護張巖邀戰失利敵勢愈張
謀取涇州大將曲端拒守麻務鎮命公為前鋒公進
據青谿嶺逆擊大破之敵始有憚公意轉武義郎權
涇原路兵馬都監兼知德順軍冬以本道軍復華州
師入命將無殺畧居民安堵轉武功大夫忠州刺史
三年冬劇賊史斌寇興鳳據長安謀為不軌公執斬

之轉右武大夫四年春擢涇原路馬步軍副總管金人謀取環慶大將婁室以兵數衆出麻務鎮公與戰於彭店原士殊死鬪殺傷過半敵引去而曲端劾公違節制坐降武顯大夫罷總管論者不平未幾復故官職改秦鳳路馬步軍副總管鳳翔府兼權永興軍路經畧安撫司公進復長安轉右武大夫忠州防禦使宣撫處置司將合五路兵與金人決戰公謂宜各守要害以待其敝秋九月師次富平都統制會諸將

議戰公又曰兵以利動今地勢不利何以戰宜據高
阜先為不可勝者衆曰我師數倍又前葦澤非敵騎
所宜不聽既而敵驟至囊土踰淖以薄吾營軍遂大
潰而五路悉陷巴蜀大震公獨整衆保散關之東和
尚原積粟給兵列柵其上或謂公宜屯漢中以安巴
蜀公曰敵不可破我不敢進堅壁重兵以臨之彼懼
吾躡其後保蜀之道也明年改元紹興春三月敵將
沒立果率銳兵犯我期必取而後進公擊敗之拜忠

州防禦使兼帥涇原夏五月沒立復會烏魯折合衆
數萬使大將由階成出散關先至公與之大戰三日
大敗而去沒立方攻箭箬關公復遣擊退卒不得與
二將合轉明州觀察使丁嘉國憂起復尋兼陝西諸
路都統制敵自破契丹以來狃於常勝至每與公戰
輒敗不勝其墳冬十月元帥四太子者會諸路兵十
餘萬造浮梁跨渭水自寶鷄連營三十里又壘石為
城夾澗水與官軍對拒公指授諸將選勁弓弩號駐

隊番休迭射矢發如雨敵稍却則以奇兵旁擊如是
三日度其困且走則為伏於神岔以待其歸伏發敵
衆大亂俘其將羊哥孛董及酋領三百餘人甲士五
百六十人屍填谷二十餘里獲鎧仗數萬拜鎮西節
度使二年兼宣撫處置使司都統節制興文龍州敵
久窺蜀必欲以奇取之三年春裒其兵又盡發五路
叛卒聲言東去反自商於出漢陰擣梁洋金州失守
公亟率麾下倍道疾馳且調兵利閬既至適與敵遇

使人以黃柑遺其帥撒离喝驚曰吳公來何速耶遂
大戰饒風關凡六日敵皆敗殺傷不可勝計撒离喝
怒斬其千戶孛董數人以死犯關出官軍後公徐結
陣趨西縣或曰蜀危矣公曰敵去國遠鬪而死傷大
半吾方全師以制蜀何憂耶月餘敵果退加檢校少
保充利州路階成鳳州制置使四年二月敵復大入
犯仙人關公豫為壘榜曰殺金坪嚴兵以待敵據阜
戰且攻壘公命將士更射又出銳兵擊其左右戰五

日皆捷敵復遁去上聞之嘉嘆賜以親札曰朕恨不
撫卿背也是役也敵決意入蜀自元帥以下皆盡室
以來又以劉豫腹心為四川招撫使既不得志度公
終不可倖勝則還據鳳翔授甲士田為久留計自是
不復輕動矣夏四月徙鎮定國徐州陝西宣撫副使
秋七月錄仙人閣功進檢校少師奉寧保靜軍節度
使五年春攻下秦州六年兼營田大使徙鎮保平靜
難軍公與敵對壘十載常患遠餉勞民屢汰冗員節

浮費歲益屯田至十萬斛又調兵命梁洋守將治褒
城廢堰廣溉民田復業者數萬家朝廷嘉之每降璽
書褒諭七年冬敵廢劉豫且益兵衆以為疑公策其
將去九年春和議成上以其功高復賜親札進開府
儀同三司遷四川宣撫使遣內侍齎詔賜公以病甚
扶掖聽命自以賞過其勞固辭優詔不許時輿地既
復方倚綏附而疾不可為矣公娶張氏封永寧郡夫
人男五拱右武郎扶攜皆承奉郎擴摠尚幼女四人

公能樂善每觀史前事可師者必書而識之左右用
兵本孫吳而能知其變務遠大不求近效故能保其
必勝御下嚴而有恩視卒之休戚如已而同其甘苦
故人樂為之用既貴而自奉之約不逾平時至推以
予士則不少吝故家無貲而至無宅以居嗚呼雖古
名將何加焉

明盛以弘銘山王繼妃楊氏墓誌銘 妃姓楊氏鉛山
恭莊王聘為繼妃未婚而王薨妃歲甫十六泣請於

父母欲入府帑不許則自縊屢解不得縊則潛入黃河濱追持不得溺則數日絕粒父母乃勉強從之入府妃拊王樞痛哭乞留曰父母業以兒許王不得殉王地下則願稱未亡人以撫成其孤父母泣喻以未婚與鉛山之貧窶令姑姊族姻百方譬阻之其志益堅不得已聽留苦次妃謝鉛華衣布茹蔬躬司啓閉辦烝嘗閨以內謚如肅如間剖決府內事未嘗不中窾於是閭閻皆受約束而妃日以撫孤為已任厯心

於飲食衣被省護無跬步少置既長令就外傳親考
課業當恭莊王薨時嗣子方五歲賴妃以成立上聞
其苦節特破例命封為鉛山王繼妃鉛山府貧嗣子
少報生請名之典既缺令甲不得嗣封妃力請于肅
王王憫之為轉奏請上亦以其節故特准嗣子紹封
嗣踰年婚禮成嗣王妃亦得冊命妃且喜且悲曰我
幽憂甘荼者十六年往矣凡為王嗣計耳今幸以微
節徼天貺得號繼妃兒封兒婚畢吾夙志踰年適歲

三十可以報先王於地下矣左右訝其言勸止之明年甲寅九月二十六日果卒妃若預知云訃聞上命照例給祭葬仍加祭一壇以旌其節蓋至是而妃之貞操昭然播于天潢中而聖明惇尚風化至意亦曉然傳播于天下奇節懿典交相輝耀為熙時一床踪曷可以無紀勒哉妃父名桐母羅氏蘭州人也初生時有光如月照四壁母病泣涕禱神願身代之在府中日製女工貸于市以供費嗣王婚聲簪珥資之嗣

王間進華美服飾堅却不受曰兒貫貸辦此余何心
能著諸躬嗣王名紳調卜於某年月日祔葬妃于恭
莊王之墓銘曰未耦也惇節倍耦未子也惇節是子
皜然堅貞孚藩府而上動乎宸扆命號恩都以暨王
封之續用溢常俟天下歎完操特旌而因灼然知聖
皇重綱常之旨吁嗟乎其節震耀夫終始

甘肅通志卷四十八